

嘉慶松江府志

松江府志卷五十五

古今人傳七

明

錢龍錫字穉文華亭人萬歷三十五年進士由編修屢遷少詹事天啓四年擢禮部右侍郎協理詹事府明年改南京吏部右侍郎忤魏忠賢削籍莊烈帝卽位以閣臣黃立極施鳳來張瑞圖李國楷皆忠賢所用不足倚詔廷臣推舉列上十人帝倣古枚卜典貯名金甌焚香肅拜以次探之首得龍錫次李標來宗道楊景辰輔臣以天下多故請益一二人復得周道登劉鴻訓並拜禮部

尙書兼東閣大學士明年六月龍錫入朝立極等四人俱先罷宗道景辰亦以是月去標爲首輔龍錫鴻訓協心輔理尋以蜀寇平加太子太保改文淵閣帝好察邊事頻遣旗尉偵探龍錫言舊制止行於都城內外若遠遣恐難委信海寇犯中左所總兵官俞咨皋棄城遁罪當誅帝欲并罪巡撫朱一馮龍錫言一馮所駐遠非棄城者比罷職已足蔽辜帝以漕船違禁越關欲復設漕運總兵官龍錫言久裁而復宜集廷臣議事竟止廷議汰冗官帝謂學官尤冗龍錫言學官舊用歲貢生近因占缺者多歲貢積至二千六百有奇皓首以沒良可憫

且祖宗設官於此稍寬者以師儒造士需老成人也帝亦納之言官鄒毓祚韓一良章允儒劉斯球獲譴竝爲申救御史高捷史莖旣罷王永光力引之頗爲龍錫所扼兩人大恨逆案之定半爲龍錫主持奸黨銜之次骨及袁崇煥殺毛文龍報疏云輔臣錢龍錫爲此一事低徊過臣寓復上善後疏言閣臣樞臣往復商榷臣以是得奉行無失時文龍擁兵自擅有跋扈聲崇煥一旦除之卽當宁不以爲罪也其冬十二月

大清兵薄都城帝怒崇煥戰不力執下獄而捷莖已爲永光引用捷遂上章指通款殺將爲龍錫罪且言祖大壽

師潰而東由龍錫所挑激帝以龍錫忠慎戒無過求龍錫奏辯言崇煥陛見時臣見其貌寢退謂同官此人恐不勝任及崇煥以五年復遼自詭往詢方略崇煥云恢復當自東江始文龍可用則用之不可用則去之易易耳迨崇煥突誅文龍疏有臣低徊一語臣念文龍功罪朝端共知因置不理奈何以崇煥誇詡之詞坐臣朋謀罪又辯挑激大壽之誣請賜罷黜帝慰諭之龍錫卽起視事捷再疏攻帝意頗動龍錫再辯引疾遂放歸時兵事旁午未暇竟崇煥獄至三年八月堊復上疏言龍錫主張崇煥斬帥致兵倡爲款議以信五年成功之說賣

國欺君其罪莫追龍錫出都以崇煥所畀重賄數萬轉寄姻家巧爲營幹致國法不伸帝怒敕刑官五日內具獄於是錦衣劉僑上崇煥獄詞帝召諸臣於平臺置崇煥重辟責龍錫私結邊臣蒙隱不舉令廷臣議罪是日羣議於中府謂斬帥雖龍錫啓端而兩書有處置慎重語意不在擅殺殺文龍乃崇煥過舉至講款倡自崇煥龍錫始答以酌量繼答以天子神武不宜講款然軍國大事私自商度不抗疏發奸何所逃罪帝遂遣使逮之十二月逮至下獄復疏辯悉上崇煥原書及所答書帝不省時羣小麀名逆案者聚謀指崇煥爲逆首龍錫等

爲逆黨更立一逆案相抵謀既定欲自兵部發之尙書
梁廷棟憚帝英明不敢任而止乃議龍錫大辟且用夏
言故事設厰西市以待帝以龍錫無逆謀令長繫四年
正月右中允黃道周疏言龍錫不宜坐死罪忤旨貶秩
調外而帝意寢解矣夏五月大旱刑部尙書胡應台等
乞宥龍錫給事中劉斯球繼言之詔所司再讞乃釋獄
戊定海衛在戊十二年兩遇赦不原其子請輸粟贖罪
會周延儒再當國尼不行福王時復官歸里未幾卒年

六十八

明史

喬拱璧字穀侯上海人副使木子萬歷三十五年進士知

海鹽縣縣田畝多說寄隱匿拱壁躬履畝稽故籍清釐歸戶悉得其實覈虛丁絜而均之一邑稱平所隸廣儲常積二倉貯衛士餉往時雜支本折侵耗百出拱壁請以冬月支屯糧夏月赴府支銀錢春秋月支倉米人司左契驗合而給之詭冒竝絕遷工部主事改兵部武選司左遷順天府教授尋陞南兵部郎出爲湖廣僉事轉

參議未上卒

郭志
名臣

張肇林字茂卿上海人萬歷三十五年進士除江西萬安令調房山愛民如子時中人劉進朝封占周口廢廠民失業肇林具狀申臺司盡逐之民賴其惠遷刑部主事

具熱審停刑疏恤刑四川多所平反擢南通政司參議

尋罷歸卒於家

上海志

楊萬里字孟圖上海人萬歷三十五年進士授餘姚令調錢塘寬仁廉潔有循聲西湖葺塞疏濬築隄海寧州田資灌漑邑豪民傳時傅曉虎視鄉曲恣爲不法萬里捕得立斃之籍其家捕得時同官有以萬金爲請貰者萬里正色拒之冬夜子女號寒孺人意色愁楚萬里笑曰此非惡聲也政最擢御史尋卒錢塘士民建祠湧金門

外上海志

喬時敏字君求上海人萬歷三十八年進士授仁和令以

慈愛爲理凡徵輸踐更勾丁置倉建牘等事皆爲杭民
百世利憲司下其法於諸州縣使爲式擢御史巡視上
江卻供應止餽遺又多所論列增解頭減煩役修安慶
城增采石兵皆有裨時政謝病歸著史奏堂集卒祀仁
和名宦弟時英字君平萬歷四十一年進士授臨海令
多惠政島寇內侵設法殲之勒石海門紀其績丁父艱
一慟而絕臨海民思之時萬字處復治毛詩有盛名閉
戶著書所選刻風行四方工古今文授徒自給張元玘
元瓏朱在廷皆出其門邑中推爲導師云

上海志

錢士貴字元冲華亭人萬歷三十八年進士授進賢知縣

丁憂服闋補上饒以治行徵拜御史時移宮紅丸挺擊
三大案獄久勿決下廷臣議士貴請誅李可灼論政府
罪如律會魏忠賢竊枋悉反三案以傾朝士士貴遂謝
病歸崇禎改元起本官遣督餉還掌京畿道尋遷南大
理寺丞以疾免家居十餘載和易恭儉節縮歲入以振
貧乏凡四民無告者生資嫁娶死爲斂埋作廣孝阡葬
無主喪及遺骸他若橋梁道路河渠寺觀力所能者無
不修舉起應天府丞值淮南被寇流渡者多又歲饑餓
萃載路士貴立義倉置粥廠計口授餐全活甚衆遷南
太常卿召爲刑部右侍郎次淮安疾作還至蘇州卒守

臣以聞詔以所拜官贈之予祭葬錄其子芳標爲國子
生芳標自有傳妻志

夏嘉遇字正甫華亭人父世英敦行不怠以孝友著稱嘉
遇萬歷三十八年進士授保定推官以治行微當擢諫
職先注禮部主事給事中元詩教輩抑之不與考選四
十七年遼東敗聞嘉遇遂抗疏言遼左三路喪師雖緣
楊鎬失策揆厥所由則以縱貸李維翰故夫維翰喪師
辱國罪不容誅乃僅令回籍聽勘誰司票擬則閣臣方
從哲也誰司糾駁則兵科趙興邦也參貂白鏹賂遺繹
絡國典邊防因之大壞惟陛下立斷疏入未報從哲力

辨嘉遇再疏劾之并及詩教於是詩教興邦輦交章力
攻詩教謂嘉遇不得考選故挾私狂逞嘉遇言詩教於
從哲一心擁戴相倚爲奸時興邦以右給事中掌兵科
先有旨俟遼東底寧從優敘錄至是以嘉遇連劾吏部
遂立擢爲太常少卿嘉遇益憤疏言四路奏功興邦必
將與其賞則今日事敗興邦安得逃其罰且不罰已矣
反從而超擢之是臣彈章適爲薦剡國家有如是法紀
乎疏奏諸御史復合辭攻嘉遇復疏言詩教興邦謂臣
不得臺諫而怒夫爵位操之天子人臣何敢干必如所
言是考選予奪二臣實專之此無禮於君者一事寧優

敘非明旨乎乃竟蔑而棄之此無禮於君者二魏光國
疏論詩教爲通政沮格夫要截實封者斬自來奸臣不
敢爲而詩教爲之此無禮於君者三二奸每事請託一
日以七事屬職方郎楊成喬成喬不聽遂逐之去詩教
以舊憾欲去其鄉知府考功郎陳顯道不從亦偏之去
夫吏兵二部天子所以馭天下也而二奸敢侵越之此
無禮於君者四嘉遇五疏力攻元趙之勢頓衰興邦竟
不果遷自引去時論快焉光宗立嘉遇乞改南部就遷
吏部員外郎天啓中趙南星秉銓召爲考功員外郎改
文選署選事時左光斗魏大中見嘉遇公廉亦皆親善

及陳九疇劾謝應祥語連嘉遇鐫三級未幾黨人張訥
誣劾南星井及嘉遇遂除名尋鍛鍊光斗大中獄誣嘉
遇嘗行賄逮訊論徒憤恨發病卒崇禎初贈太常少卿

史明

包鴻逵華亭人秀水籍萬歷三十八年進士授湘潭令邑
衝途苦郵政積弊難理鴻逵才性敏贍因時調劑怡稱
辦暇則與邑中士大夫論文講藝民庶和樂稱爲仙吏
嘗輯紀事錄述其治潭之條理云

湖南
通志

雷迅初名德音字聖肅其先江西人元末徙青浦少孤力
學中萬歷三十四年舉人崇禎閒授夔州推官與陳子

龍友善後署夔州府事居官廉介時羣盜滿山楚蜀尤甚夔府爲川東門戶迅嚴亭障戍軍實境內肅然尋以侍養告歸詩文散逸嘗著杏花春雨江南賦最工盛傳

於世

青浦志

喬一琦字伯圭上海人父懋敬前有傳一琦少任俠膂力過人好走馬擊劍工書善詩稱文武才中萬歷三十一年武舉歷官遊擊將軍監朝鮮軍與劉綎並抗大兵軍敗走入朝鮮營朝鮮都元帥姜宏立副元帥全景瑞率衆降一琦投滴水崖死贈都督同知

國朝乾隆四十一年

賜諡忠烈

上海志

盛萬年上海人多膂力善騎射爲喬一琦前鋒調赴遼左

至滴水崖戰死聘妻蘇氏聞信自經見列女

上海志

宋懋澄字幼清華亭人孝廉堯俞子也年弱冠能文章喜
交游慕古烈士風私習兵法散財結客欲建不世功年
三十餘始折節爲儒北游京師爲太學生時光宗與福
王同時出閣講學禮數無等差懋澄上書太宗伯羅萬
化謂皇長子皇次子出閣若等威不定必啓天下之疑
書凡數百言宗伯心是之然時多忌者遂歸屏居歲餘
居母喪一如古禮萬歷四十年舉於鄉三上春官不第

卒懋澄當萬歷時遇人必抵掌論世事嘗喟然歎曰二
十年後天下將有兵而我不及見也後卒如其言詩文
奇矯俊拔尤工尺牘及稗官家言有九籀集別集行世
子徵與順治丁亥進士

字苑

孫元化字初陽上海人嘉定籍萬歷四十年順天舉人薦
授兵部司務轉職方司主事忤璫閒住崇禎初起廢歷
山東參議寧前道防邊敘功陞都察院僉都御史巡撫
登萊後於遼陽抗

王師殉節

董羽宸字元孚上海人萬歷四十一年進士授餘姚令以

明幹稱擢雲南道御史巡視山東時妖賊徐鴻儒扇亂青齊閒所至殘破羽宸單騎入賊諭以威福衆稍散旋以兵勦之殲其魁丁外艱服除命巡順永保河守通州敘勞績授順天府丞崇禎元年陞光祿卿晉左副都御史明年晉吏部右侍郎兼掌院篆忤首揆薛國觀又糾臺員不職左遷南京尙寶司卿尋削籍歸卒年七十八所著有擇焉小草諸稿傳志

張爾嘉字錫之青浦人萬歷四十一年進士授東陽令擢兵部主事遷郎中疏救劉光復薦鄒元標執政憚之與崔呈秀忤補浙江布政使參政分守紹寧台道卒於官

同時有張爵儒亭人官兵部主事亦以忤呈秀謫官

應天
隨筆

王昌會字嘉侯上海人圻孫萬歷四十三年舉人屢試不第遂絕意進取杜門讀書太守方岳貢欽其風聘修郡志昌會固辭陳徵君繼儒作書勸駕乃就志中賦役鹽權諸條俱出其手晚年築室松原門無雜賓廣堂宏厥前列圖書後陳女樂每花晨月夕卽開樽宴賞恟然物外時論賢之年五十八卒所著有全史詳要諸書弟昌紀字永侯幼穎敏讀書數行俱下手輯十七史四十餘年足迹不履城市時稱王氏二龍年八十六卒昌會子

灝亦以文名與修邑乘

上海志

許譽卿字公實華亭人祖汝升前有傳父身萬歷二十二年舉人譽卿登萬歷四十四年進士授金華府推官天啓三年徵拜吏科給事中抗疏極論魏忠賢大逆不道已復疏陳時弊忠賢怒會逐趙南星高攀龍譽卿偕同列論救遂鐫秩歸崇禎元年起兵科給事中時屢詔起廢而當事者悉忠賢遺黨多方沮抑譽卿既復職極論魏廣微罪乞榜示朝堂從之楊鎬王化貞未伏辜東江大將毛文龍擁兵登萊索餉譽卿竝劾奏已復陳五事規切廷臣甚至都給事中薛國觀以嘗附忠賢恐京察

被黜力訐譽卿爲東林主盟結黨亂政譽卿上疏自白
卽引去七年起故官歷工科都給事中明年正月流賊
陷潁州偏鳳陽譽卿慮賊犯寢園乞急調五千人防禦
疏入而鳳陽已陷陵毀譽卿痛憤直發本兵張鳳翼固
位失事及內閣溫體仁王應熊玩寇速禍之罪疏三四
上帝終不聽譽卿當擢京卿吏部尙書謝陞希體仁意
出之南京適山東布政使勞永嘉賄營登萊巡撫陞等
列之舉首御史張纘曾劾陞疑出譽卿意遂疏攻譽
卿謂其營求北缺不欲南遷爲把持朝政體仁從中主
之遂削籍福王立起光祿卿力辭不赴國變後久之卒

明史參修
一統志

張履端字旋吉華亭人兄拱端弟軌端萬歷四十年三人同舉於鄉郡人以爲盛事履端成四十四年進士知晉江縣丁父艱服除補束鹿束鹿多惡少年白晝行劫吏莫敢問履端至誅首惡其好勇喜事非真盜者賞之使捕盜自贖盜屏迹滹沱河數決爲城患履端曰城直河衝勢且圯安能率父老以與河爭此土也宜徙乃閱義倉出積粟市芻藁木石兼餼就役者去河二十里作新城四百日而畢規制詳密民忘其遷秩滿當擢臺諫屬瑰忠賢專橫羣小附之者得要職履端泊然無所營授

兵部主事旋以尚書王永光災變陳言事奪職崇禎改元召復故官病卒軌端字方同工文章風格嚴整署興化教諭遷邵陽知縣時楚賊勢張犯境軌端遣使約苗洞長出兵赴急大破賊於天王寺巡撫陳睿謨以聞得旨獎賚軌端敦尚行誼伯仲旣沒撫羣從恩愛甚篤子姓多見稱於世

婁志

杜開美字袁度上海人獻璋子生有異才於書無所不覽下筆數千言立就尤長尺牘神宗時授中書舍人以母老乞歸著有秋水遠游扣舷貂裘潤州白門敝帚行藥蝸甲閒居諸草行世其蘭陔堂未刻稿藏於家

南匯志

葉有聲字君實上海人居石筍里萬歷四十三年舉應天鄉試第一明年成進士除侯官令邑當省會有聲均役省徭不事筆楚政畢舉天啓五年擢禮科給事中首言四事一勤政二治體三言路四仕途又云天下猶器也久而不操將有投之柄者願皇上熟思治亂之關以公論還政府以直道還臺省天下幸甚時魏忠賢用事屢攘邊功竊封爵有聲新參入直疏有疆場赤白其羽幕府衛霍其勳之語忠賢銜之閹黨又宣言於朝欲進忠賢王爵有聲衆中叱之坐是削籍崇禎嗣位召見奏去國始末奉有勁直可嘉之旨外轉浙江副使六年分守

武昌道時湘陰寇東下直偏省城有聲登陴捍禦寇引去七年遷福建參政尋轉河南按察使流寇老狃狃率賊數萬直抵大梁有聲與撫按協謀使驍將陳永福以奇兵繞出賊後城中出兵應之賊奔潰追斬數百級越三月賊悉衆來攻乃堅壁清野相持月餘夜賊衆隧道以入發火器殲之解圍去遷江西布政使累陞左副都御史召對條奏兵食利弊甚晰時臺端虛位有聲攝院篆首相薛國親時方用事與有聲善儉人某營求科道不得怨薛與有聲遂陰搆大獄薛賜死免有聲官及某伏誅始獲昭雪召拜兵部侍郎不就卒著綠天館文集

疏議四卷子映榴另有傳

上海志

杜喬林字君遷上海人父若考以儒行稱喬林登萬歷四十四年進士除刑部主事出知湖州府府枕太湖故多盜時天下多事巨盜竹林圖王會王崑崙等竊發自號蛇山王喬林與鄰郡合力擒之長興賊葉朗生等潛踞湖中出沒無定喬林使人偵伺密謀誅擊會其黨自歸虛實盡得亟襲之朗生等就縛凡五十餘日羣盜悉平奏功當遷民諱曰府君活我奈何舍我去巡撫言於朝就加按察司副使知府事如故秩滿遷浙江水利道副使丁父憂服闋起補福建屯鹽道轉右參政遷山西按

察使浙江右布政使分巡溫處到官六日海寇劉香入
犯圍府城喬林募勇士韋古生等晝夜捍禦出兵奮擊
三戰皆捷賊乃焚其木城引去事聞再獲褒賜以病告
歸卒長子麟徵字仁趾少有英譽與太倉張溥齊名登
崇禎四年進士授刑部主事少從父宦游曉習吏事尚
書使掌章奏時太監張彝憲等總理部事監宣大諸鎮
麟徵上疏極諫尋改兵部職方司爲尚書熊明遇所重
其請授諸將事權及定滇寇普名聲麟徵條畫爲多又
上書極論時政得失丁母憂歸卒年三十九著有浣花

遺稿

通志

王陞字超之華亭人萬歷四十四年進士授常山知縣調山陰丁父憂服闋補固安入爲工部主事當董作三殿時魏忠賢擅政欲見之陞不往銓司缺廷議舉陞忠賢抑勿用改兵部職方司會天變偕同官張履端草疏代尙書王永光請省刑薄斂大忤忠賢意永光引去陞會以母喪去職得免崇禎改元補本官歷太僕寺少卿薦虛象昇專督楚豫以靖寇六合舊無城當寇訐淮泗陞請以兵部所省江南驛站銀築之建昌人鄒魁統上疏言孟河有蛇山僞王謀叛事下兵部陞請下撫按覆勘果無驗楊嗣昌爲尙書奪情起復言者皆獲罪陞面詰

之曰公欲效李賢邪嗣昌默然自是頗相左在何寺值
薛國觀當國怨陞不附己再推山西湖廣巡撫皆不用
遂謝病歸卒於家陞清亮自立言論有風采兄弟五人
兄陞以明經爲訓導弟喜坊桂皆舉鄉薦友愛無閒坊
爲南雄推官多惠政有禦寇全城功南雄人祀之名宦
祠臺以詩文知名於時

婁志

沈猶龍字雲升華亭人萬歷四十四年進士除鄞縣知縣
天啓初徵授御史出爲河南副使崇禎元年召復故官
進太僕寺少卿拜右僉都御史巡撫福建江右妖賊張
普薇作亂猶龍遣遊擊黃斌卿協勦大破之增秩賜金

以憂歸服闋起兵部右侍郎兼右僉都御史總督兩廣軍務兼廣東巡撫福王稱號召理部事不就乞葬親歸明年南京失守列城望風下閩六月吳松總兵吳志葵自海入江結水寨於泖湖會總兵黃蜚擁千艘自無錫至與台猶龍乃偕同里李待問章簡募壯士數千人守城聯二將相爲倚援八月

大兵下松江猶龍中矢死諸生戴泓等佐猶龍守城亦赴水死猶龍子浩然走匿爲僧乾隆四十一年猶龍

賜諡忠烈泓入祀忠義祠浩然自有傳

明史參修
吳興集

陳所聞字無聲華亭人祖鉞好任俠島寇入犯率傭奴二

百人擊之頗有新絀備兵使者任環欲官之辭不受獻其良馬而去曰以報知己也父善謨慷慨好施訓子甚力所聞成萬歷四十七年進士當試館職請急歸明年投刑部主事時內侍劉李輩以李選侍噓囂官獄在繫士大夫扣扉往還無愧色諸郎官見之必避席雅拜退則使人通殷勤其報謝亦不貲獨所聞視之如常囚他日同舍郎邀飲款曲屏人請曰某託致公幸假顏色不敢忘報所聞粲然謬醉應以他語索馬歸明日上記尙書言內犯驕肆不省愆交外人宜禁尙書勿善也未弔月調工部主事董作神宗陵奄人監護恣乾沒所聞故

饒心計凡工作所需材用皆與商平較而給直虛冒無所容奄人憤思與爲難不得閒而其黨有盜尙方陶甄作私廬爲所聞覺發且上奏奄懼委罪於從吏尙書爲之解乃榜其吏毀其室歸輒於庫羣奄奪氣八月元宮成冬復治光宗陵所聞以陵近礮道且寒涸土僮工必不固當俟春融尙書持不可會所聞以父喪解職其後積兩傾圮卒成大獄乃追思其先見焉所聞在官最有清望及奔赴號慕毀瘠家人幾不相識未幾疾作時南昌萬燥以糾奄人杖死所聞與燥同曹友善實與共謀泣謂其子曰萬公當不獨死意恐有連又聞奄人與爲

難者皆用事憂憤卒年僅四十名臣

郭志

趙東曦字馭初上海人萬歷四十七年進士崇禎五年由知縣入爲刑科給事中請興屯塞下以充國用不報適宣寨有私和事內官王坤時監宣餉且請代東曦上言宣寨失事陛下赫然震怒逮巡撫沈聚罷本兵熊明遇乃監視王坤方會飲城樓商榷和議邊臣倚庇欺蔽日甚坤不得辭扶同罪反幸邊烽已息爲己功且請代夫內臣之遣陛下偶一用之非不易之典今卽盡撤之猶謂不早坤願請代圖彌縫於去後願陛下正坤罪撤各使還京帝言宣鎮擅和竇坤舉發何謂欺隱謫福建布

政司都事稍遷行人司正禮部郎中奉使還里福王時

召東曦爲給事中已卒

明史

董象恆字有仲上海人萬歷四十七年進士知開州白蓮
教倡亂犯州境象恆率壯丁捍禦城賴以全遷兵部郎
中出爲福建右參政分守漳南海寇鄭芝龍出沒鈔略
撫按檄象恆分道勦擊克之復與遊擊歐陽瑞撲滅山
寇於冷羊頭巖閩海底定終養歸服除補福建屯鹽右
參政屯鹽夙爲弊藪象恆悉心釐剔商民便之擢右僉
都御史巡撫浙江時需漕孔亟浙艘回空獨遲迫則封
民船以濟象恆稔知其困首先捐俸屬吏樂輸造漕船

五百有奇不費帑不擾民督漕史可法題敘下詔褒美
流寇內偪徵兵勤王象恆發援師四千入衛爲天下先
運歲災荒萑苻嘯聚象恆奏請蠲賑賊漸解散故所在
多殘破而兩浙獨完以蜚語逮繫詔獄民爲罷市詣闕
訟冤者萬餘人國變後獲免歸坐臥一室參閱內典年

七十而卒

上海志
參稽志

李逢申字延之上海人伯璵五世孫萬歷四十七年進士
除慈谿縣失奄黨意左遷丁母憂服闋起上林苑監丞
陞工部主事甫三月九上封事劾兵部尙書梁廷棟誤
國疏寢不報會軍興驗試火器廷棟以危法中逢申論

成澈浦逢申長子雯走京師訟冤雯弟又伏闕上書事
得白召爲刑部主事轉工部郎逢申又五上疏論時政
有所彈射時流寇已薄秦晉逢申疏請結義旅以空名
告身與廷臣分募三輔山東兩河豪傑衛京師廷議中
阻甲申三月賊陷京師逢申被執不屈身受五毒自經
死子雯自有傳通志

陸從諭字耳宣華亭人苦志讀書究心濂洛關閩之學旁
及諸子百家冀爲通儒萬歷二十二年以浙籍領鄉薦
又二十五年始成進士授國子監博士歷工部員外晚

年徙居當湖

先進
舊聞

文若字更生初名景文上海人萬歷三十四年舉於鄉
與常熟許士柔孫朝肅同郡馮明玠崑山王煥如五人
爲拂水山房社以奇文鳴一時四十七年成進士知汶
上縣以嚴察爲治調秀水簿書填委不廢簡翰再調光
化意不自得或兼旬不治事扁舟往來江漢閒以釣筒
詩卷自娛遷南京兵部主事爲考功陳某中傷左謫稍
遷南京大理寺評事以憂去官卒於家時年四十八文
若美姿容工談笑雅慕晉人風度好爲樂府詞章識者

擬之湯臨川云

郭志
文苑

隗桂官上海人居三涇幼孤業賣糖擔入街巷得錢卽市

酒肉供母自食糠粃恆不飽暑無幃爲母驅蚊終夜不
暝冬無被拾蘆花雜敗絮先臥暖以待母如是者三十
年一日戶不啓鄰人掀門入見母已死桂官臥尸側嗚
咽不能語因相與贖金具棺斂桂官匍匐拜謝不食死

上海志

朱養豫字立凡上海人一德從子父一讓患瘵養豫備書
訓蒙奉湯藥惟謹父卒殯葬如禮母孫氏病中風養豫
進飲食侍臥起不假寐者卅月病愈杜門謝客不離母
側當事旌之

上海志

蔣子良金山衛城人性至孝竭力事父家貧爲人傭以忠

勤倍常直藉供甘旨父老病子良雞鳴起爲櫛沐夏則負置涼爽地冬具爐火煖酒囑鄰人謹護視然後出日下春歸一味之甘輒遺焉終父之身未嘗少弛當事旌其居曰孝子之門

金山志

陳民表字元望華亭人年十七爲諸生授徒事親母年五十遘危疾醫藥罔效涕泣徒跣夜半輒叩城隍神願損己壽益親算數日後虔禱不懈恍惚見從神手一牌上書准延壽三字殊瀋淋漓注手指閉自此日瘥後父壽至八十六母壽至九十七皆謂誠孝所格云

郭志獨行

張雋字永思華亭人以貢爲龍泉學博擢知陽朔縣父疾

割股作羹以進獲愈及父沒廬墓不樂仕官閉戶著書

知府莊毓慶顏其門曰孝子廬

郭志獨行

莊大儒字仲醇先世自大梁僑居華亭之萬年涇後繁衍至數千指故稱其地爲莊家行云大儒八齡失恃事繼母孝母卞急輒長跽自責母爲感動錢肇陽講學郡中問難折衷大儒功最多平湖陸莊簡慕其文行延爲童子師其親信某者欲得一顧以爲重乃治具候之且以多金爲壽竟不往時肇陽仲子機山相國成進士官翰林兄事之有疑事疑義必就正而後卽安意有未可則默然不應相國屈意從之居恆寡言笑喜怒不形對童

僕如賓客里人多質成焉或抱愧自引退家貧授徒自給竭力振宗黨之急爲外祖傅氏築墓恤友人馮文淵之喪而撫其遺孤其好學篤行類如此著有鞭駑知非

錄

吳騏集

張安豐字大年華亭人五歲喪父哭泣拜跪如成人長從諸兄讀恆夜不就寢母翁氏命之休乃止以諸生入太學授武康縣訓導課士先品後學諄諄如訓子弟家有凌霄石甚奇古構軒其旁朝夕觴詠與弟憲副安豫相友愛卒年四十八安豫自有傳

張氏世譜

黃椿字廷茂上海人性孝友每出必豫儲甘旨始行親疾

衣不解帶及革親貽以金曰佐汝喪葬費椿營葬異
出所貽分諸昆季兄早沒育其孤爲之娶共爨五十餘
年門庭雍睦人稱長者

上海志

宋天淳字伯殷華亭人賢曾孫八歲喪父明年母繼沒兩
棺在殯稍長卜地於干巷之陽里豪徐氏有地與墓連
謂非十倍其直不售天淳如數與之豪意遂而諸無賴
復奇貨居構訟百端符檄旁午天淳以一身楮柱其閒
心力交瘁遂得瘵疾已而訟解伏枕不能起葬之日乃
以衰麻加身偃臥牀上一慟而絕年二十四

奉賢志

周汝銘字懷雲華亭人性純孝幼喪父終身孺慕每祭哭

泣如初喪高才博學不求仕進世居干山之陽足迹不入城市詩文爲時推重著有懷雲山人稿

妻志

沈文亮字星白華亭人父鎬以力學得瘵疾將不起文亮髮纒覆額哀號禱天願以身代時有碧雲巖供觀音大士病者乞楊枝水愈之乃步拜乞靈若聞空中語曰父病深矣豈勺水可救惟臂血足療耳於是夜藏薙髮刀刺臂血投糜中以進病始瘥翁不知也又嘗侍翁試留都比歸大風陡作舟幾覆文亮抱翁泣禱得免人以爲孝感云戊子歲饑首捐粟賑施諸藏粟家爭相倣倣人賴以濟爲諸生有盛名

郭志
獨行

奚欽字聖功上海人有鄉人負其金者往責之其家固留
欽宿而飾其女出見曰所負實不能償願以此女侍衾
枕欽拂衣起排闥出走宿友人家至夜分大吐曉起視
之蟲如髮者數百蠕蠕動欽素病瘵自後遂愈又嘗還
道拾遺金類多隱德云

郭志
獨行

王時亮字見素華亭人居七寶爲諸生負才譽里中有宦
裔某倚勢侵鬻宮隙地郡邑中羣起攻之而時亮爲魁
宦謀中時亮法以沮紳士之氣乃誣奏事下部院首列
時亮名時亮徒步走京師伏闕上書申辨卒得直悉以
所侵地還學宮士林重之

青浦
志

朱忠聰字敬愚上海人以貿易致素封喜交當世賢豪嘗
鑿義井捐義冢建石梁修祠宇施藥捨棺樂善不倦萬
歷閒郡邑交旌之同時有杜啓勳高恩者亦以義行稱

南匯

志

徐肇惠字蓋夫華亭人文貞孫善屬文手輯先進遺風錄
自宋文憲迄文待詔徵明凡六十五人人系以頌闕世
俗蒙養之失著男訓女訓二篇又著臆說若干篇論者
謂其言近旨遠刻文貞世經堂續集捐田六百畝以贖
族復捐田八百畝以助三學諸生膏火王圻范允臨洪
都皆有記年五十六卒從弟元誌字吉人諸生入太學

好行其德宗族鄉黨稱之萬歷己亥郡大饑元詰時年十三出餘粟以濟貧者弟元讚字解人亦以品誼重於時兄弟相友愛竝依鶴塘涇丙舍以老

徐氏世德紀略

陳至孝華亭人臨江太守浩孫浩多著述書法歐虞至孝能世其家學有韻府摘鈔銘簡雜纂筆未集席門諸稿弟至友亦以篤行稱時同里姚來鶴唐文恪受業師也與其弟來鵠俱能端渠燠教授生徒或當久別輒執手涕洟白頭孝友與陳氏昆仲相若

顧秉禮字育字華亭人砥志力學研窮理要於書無不綜覽知府張九德知縣聶紹昌延主鄉塾抑華崇實游其

門者慶得師焉秉禮少應試爲弟某所齟齬被黜及爲諸生後見弟有子就外傳喜動顏色攜赴館舍教肄之其友愛肫篤不宿怨如此孫大申自有傳

妻志

朱錦字尙綱上海人家不甚饒顧尙義萬歷壬子秋海盜收瘞甚多辛卯學宮圯邑令楊遇捐二百金授錦督修錦還金力任其役工竣產亦罄令強授之乃置田百畝助學他如還王松婦返姚宥媳全范相豕尤人所難兩臺高其義旌之

南匯志

唐汝詢字仲言華亭人居白沙里五歲而盲以耳受書博通羣籍弱冠著唐詩解交游日廣萬歷閒御史楊鶴駱

駿聞汝詢名皆肅禮幣見之甚歎異汝詢以竟陵詩歸
有乖雅調復作彙編十集學者宗之兄汝諤字士雅博
學好古爲青浦知縣屠隆所重以貢歷常熟宿遷教諭

陞安慶府教授年老不赴亦能詩

郭志文苑

陸維埏字際卿上海人有夙慧肆力於古以文章名世游
燕市五載與陳太僕所蘊交最厚歸而學益進從游者
日衆凡里中一時碑文墓記鮮不出其手邑令呂愷嘗
聘修邑志不赴持躬端謹士林重之從子鑑字元美爲
塢子詩古文辭咸擅長尤勤於搜討見聞所及輒用劄
記著有百一集均以諸生終

陸氏家傳
上海志

士釐字稗龍後更名畹芬上海人大參邦正孫也耽嗜
典籍少從父宦游京師年十五遂以博洽名其學長於
經術尤精三禮郡人治禮者必從講授至今曲臺業宗
戴氏數奇不售年四十餘始貢入太學爲廬州府訓導
甚有聲望屢薦當選會崔呈秀巡按江北索餽金士釐
不與呈秀扼之轉湖廣漢陽府教授棄官歸崇禎二年
起爲衡府教授以老辭長史三移牒徵之乃赴以耆德
宿儒深見禮重踰歲謝病歸年七十三卒所著見藝文

中

郭志
文苑

朱啓明字天雲華亭人賢曾孫工詩八歲詠新柳有梅花

未落憐同調黃鳥初來問主人之句爲王司寇世貞所賞人皆以宋新柳稱之長游白門旅吟有家貧夢亦寒之句詠邊塞有路遙歸夢短霜重鐵衣輕之句旅舍聞鐘有不向高樓警醉夢偏來孤館促愁心之句人又以宋三夢稱之後游京師以太學生入志館與修吏部志書成授翰林院待詔在京師十餘年所作詩尤多名句傳誦人口會以不附魏闈爲所怒遂棄官歸卒

奉賢志

曹誠字守愚上海人世爲醫誠尤精爲人敦樸自守兵亂時避走五里村有川沙人失所攜金惶急欲死誠得之立還無矜色一夕命其子同宿藥肆中指一布囊曰此

頃所拾路旁物也入內臥倘失者來何從知之乎侵晨
果有諸暨紙賈泣覓者還之如前誠少時卽有廣福寺
前還遺金事交稱長者陳所蘊爲作守愚先生還金傳
壽九十一卒孫垂燦順治丁亥進士郭志

獨行

徐炯字繼山華亭人居南橋偶儻好施歲收責有不能償
者出券焚之自南橋至莊行爲橋十有二歲久傾圯行
者病涉遂捐貲悉建石梁街北有佛廬炯因故址建巍
樓其上佛殿僧寮竝爲修葺一鎮賴鎖鑰云年八十六

卒

奉賢志

周規字象園上海人後徙澱湖再徙嘉定無妻子少有膂

力學擊劍騎射萬歷末上書數萬言論邊事不報一日
出門歸拍案數四家人怪之曰士紳皆木偶內外交訐
死無日矣詩豪邁中時有清逸家貧喜飲酒好結客遇
山水輒句留時復仰天悲呼舉世莫測著有醉餘草莫
秉清序之上海志

許經字令則華亭人從陳徵君繼儒游高才絕學所作行
卷徧滿數郡而毛竹謠義田歎開河行諸詩感時觸事

矢口長謠人謂一時詩史

名諧
偶鈔

盛鈇上海人居洋涇有友人妻寡而貧來依之鈇收卹甚
至久而婦有狎意鈇正色拒之以禮遣去後鈇被倭逐

墮黃浦浮經日遇漁舟救免人以爲不淫之報

上海志

董仲隆華亭人慷慨好義北關有居民昌留者負人錢歲暮逼迫無計賣妻五十金以償臨別道經董舍攜手哭送道仲隆送客出見叩以故卽邀入如數與之曰以此償逋復贈五金曰汝夫婦可將此度歲無生他意留與婦俱泣謝去鄉里義之後十餘年留以捕海盜功授總

兵職銜歸里仲隆尙在與之往來無間

董氏雜志

顧元啓字子賢上海人諸生以端士稱嘗讀書外舍有鄰女投之元啓不納里中有告急者傾囊貸之貧不能償卽焚其券卽前負者復以急告貸之如初

上海志

陳理字良玉上海人少受詩於潘恭定恩有文譽性坦夷不設城府家素饒藏金悉歸兩異母弟兩弟時挾母齟齬理沒齒無怨言舉鄉飲賓不赴時人高之

上海志

沈紹曾字復之華亭人苦節先生後也性至孝博覽書史家貧授徒自給操行端慤一言一動必期誠信家居柳濱前有五洲中洲較大嘗云德有五常非信莫載殆如是夫因自號四一天民著傳以自見屢試輒不售賞志以沒朱紹堯每謂人曰沈子清德可師苦節家風於斯未墜也以子荃貴累贈中憲大夫

郭志
編行

王檄上海人性寬仁急公好義邑有重役人爭營脫檄挺

然曰往役義也可累貧弱乎遂身任之又捐貲濟吳松江歲饑出米助賑邑令旌之子懽順治庚子舉人孫明

允有學行

上海志

陳懽字侍誠祭酒文莊孫也以祖廡補光祿寺丞棄官歸隱卒年九十其從子球字貢玉以孝友稱年亦九十子大經字子常經明行修教授鄉里出其門者後皆登高第成名儒所著有通鑑便蒙五經摘要蘆溪草諸書高年如父祖子應祈字遂卿謹言笑慎取予鄉里稱善士年八十三時人稱四世耄耋云

奉賢志

徐琳字雍卿刑部侍郎陟子以廕仕太常典簿歷官楚雄

府知府有政聲居鄉承父志捐田一百八十畝於府庠一百五十畝於縣庠以資膏火董其昌馮時可勒石以紀建義莊贍族親知貧乏各應所求有母死乞棺者琳與之金其人本無母家人白之琳曰施棺以惠死施金以惠生其事一也置不問晚年戒殺放生施藥掩骼年七十一卒猶子爾鉉副貢生工詩古文亦嘗助田百畝

於青浦學餘詳鉉傳

徐氏家傳

焦正藩字彥紘華亭人萬歷四十六年副榜負異才讀書過目成誦嘗於坊閒購新刻登舟開卷覽一紙則棄一紙於小舟抵岸紙已盡異時錄出一字不遺尤善鑿拔

同郡章曠文筆簡峭多四字句人以千字文笑之正藩獨賞異曰此豈風塵中人邪武林黃澍才氣卓犖俗尤怪賊樹攜所爲文來正藩大推服曰是且以功業見豈直掇科第而已澍遂邀正藩館其家未幾曠與澍俱成名進士入

國朝正藩久辭世澍猶親至其居訪問後人勤倦久之而去所著載藝文中

金山志

陸郊字承道上海人文裕公深嗣孫補父廕爲南京都察院照磨轉都事遷宗人府經歷授石阡府知府石阡古夜郎地苗獠錯居徭役龐雜郊倣吳下條編法著爲令

稱便郡僻陋無書籍鄰自家輦經史教之士始向學播
酋思亂郊經畫翦其角距邊境獲安推苑馬寺少卿力
辭歸郊事母孝遇族人有恩紀家門肅雍無忝先訓子

堦字舜封有令德世其家

陸氏家譜

莫天淳字還甫華亭人幼孤事母孝母疾剗右肱肉以進
母疾瘳而腕傷不任舉筆遂習左手書天啓元年舉於
鄉授涇縣教諭遷仙游縣知縣縣南楓亭驛介漳泉間
地阻險奸民林纘元等聚眾謀不軌犯城邑督撫調兵
千人期之天淳挺身爲士卒先民聞縣官出皆持槌鼓
前奮擊大破之擒纘元焚其七寨餘眾潰散閩南以寧

滿考擢南刑部主事卒

婁志

王國材字達甫上海人天啓元年舉人授黃巖令調臨海以廉平著海門衛兵變單騎撫降之會夏旱步禱雨降卽於是日卒時已擢南臺御史未及任士民惜之建祠方山之陽與天淳竝稱循吏云

郭志名臣參上海志

吳家瑞字世禎幼孤兄某前母所生愛家瑞甚至嫂沈撫之亦有恩里人稱之家瑞少有至性自以不識父母長而哀慕終日閉目凝思如是數年恍惚若有所見遂援筆圖之狀貌如生覽者感歎舉天啓元年鄉薦除富塗教諭擢延平府推官旋移雷州府同知所至著稱謝歸

結廬墓側以終

妻志

李之楠字仙植上海人伯春從孫天啓元年舉人嘗買妾詢爲前母族卽召其父具貲嫁之究心內典病革割產施宗黨次及二子事畢就外寢跣坐而逝

南匯志

孫士美字公聚華亭人本姓朱太常卿奎之後祖出繼孫遂以孫顯登天啓元年鄉榜授舒城教諭崇禎八年流寇至舒城令以他事出土美代守七十餘日城賴以全擢知深州十一年冬城破望闕再拜題詩蕪蕪亭引刃自剄於城上卹贈太僕少卿父訥字敏甫仕天策衛經歷就養州署時年七十餘亦自縊一家從死者十三人

子芝秀字止文芝玉字放質皆諸生葬父祖於鄱尉山
後杜門讀書節義自矢人稱孫氏二孝子乾隆四十一年

賜士美諡忠烈訥入祀忠義祠

婁志

王域字元壽華亭人天啓元年本人授宿州學正流寇至

佐有司捍禦有功遷工部中唐王時以江西按察副

使管建昌府事

大兵圍建昌守南門城破械至武昌不屈死子鑰錚皆諸
生聞父被難錚子身走建昌求域葬處刺血徧瀝諸墟
墓卒不得父尸慟哭而返終其身茹素飲泣未嘗見齒

弟垆字襄城亦以孝友聞乾隆四十一年城

賜諡烈愍妻

李世祺字壽生青浦人天啓二年進士崇禎初擢刑科給事中陳大計之當定者二曰兵食之計民生之計大弊之當釐者三曰六曹之弊在吏胥邊吏之弊在欺隱貪墨之弊在奢靡夏旱帝禱雨未應疏列郵畿旬緩催科豫儲備三說帝竝納之帝遣中官監視諸鎮世祺上言內臣入奉天顏出司兵食既得陰伺內廷意旨又得顯操外廷事權魏忠賢盜弄神器奈何躬自翦之復自蹈之不納時進言者多獲譴帝又日親細務任察爲明世

祺上言諸臣言苟未當輒蒙詰責詰責未已貶黜隨之
言者前瞻後顧恐干嚴譴依阿得策折檻無聞且天子
一日萬幾神太運則疲精太用則竭聖人使公孤百職
環列任事但責其成不侵其事課其效不紊其權奚必
效後世察察之治帝不能用八月淫雨損山陵昌平地
動又上言采公論以進退大臣酌事情以衡量小臣釋
疑忌之根開功名之路庶天變可回時艱可濟帝以借
端瀆奏切責之七年疏劾大學士溫體仁吳宗達及兵
部尚書張鳳翼溺職狀帝怒貶福建按察使檢校且追
罪文選郎吳鳴虞考選非人亦貶三秩御史龔廷獻論

救不聽久之起行人司副十五年遷太常寺卿國變後

杜門不出以壽終

青浦志

何萬化字宗元上海人天啓二年進士授吏部主事陞郎

中擢福建提學副使所至稱得人福寧州在海中航海

就試患風濤萬化捐貲建館於州學使就州考校州人

德之辛未以本省參政備兵建寧終養丁內艱丁丑起

江西湖東參政時張普薇以妖教聚徒千百連破郡邑

萬化募兵措餉廣布方略敗賊於楊坊神岡破其十二

寨開五不殺之條帥師進剿連擣十一巢乃給免死牌

招其脅從賊衆皆投戈星散迫獲普薇斬之湖東平萬

化勞苦行閒以疾告歸己卯遷廣東按察使不赴卒年七十五萬化宦業蕭然而於親故不吝周給沒之日篋中止遺稿數卷人歎其賢

魯志

張昂之字匪石華亭人天啓二年進士知廬陵縣城外白鷺洲向有書院祀文信國天祥至是郡紳有附闖者欲因其地改建魏瑞生祠昂之力爭事得不行然卒以此受中傷削籍歸崇禎初起兵部主事出知保寧府張獻忠寇蜀昂之召募壯勇力禦梟其偽帥措餉給軍嚴疆安固以功遷川東道尋告歸晚年居白龍潭以壽終

通志

朱長世字子久上海人天啓二年進士除工部虞衡司主

事時方用兵軍械皆取給於部長世移臥公廨視事尙書張鳳翔知其忠勤題薦爲正郎會六軍守城需懸簾十萬一巨璫夜詣部曰予我十萬金可立辦蓋內庫所儲也鳳翔謀於長世拒勿與竭三晝夜之力懸簾具璫恨之莊烈出按軍壘璫指其一二紕薄者中以危語上震怒鳳翔下獄長世廷杖死長世孝友敦睦其卒也士大夫痛惜之子在鎬崇禎壬午舉人

上海志

張元玘字采初上海人天啓二年進士除刑部主事奉使齎餉寧夏所過餽遺及王國賜予皆辭不受遷員外郎轉郎中出知嚴州調建寧府府衝劇郵傳疲困元玘事

爲裁制立條約請臺使勒之石由是供億不擾又更離
政及錢法民皆便之告歸所著有廣史及雜著詩文數
十卷孫錫懌順治乙未進士

郭志
名臣

李世邁字懷古華亭人少慕高隱喜讀書明季與其友沈
蓮臺相約不婚爲父兄敦迫娶未踰年妻卒自是獨居
一室高槐古梅竹鑪茶銚與至鼓琴一再行聞雨滴芭
蕉聲輒喜而不寐人號曰喜雨翁授徒自給吳騏其高
足也中歲豫作生壙題曰多壽多辱無榮無憂不滿甲
子我將歸休崇禎十一年年五十九果卒蓮臺竟不娶
讀書不求人知以醫自治生一錢不妄取爲顧元慶治

目愈不受謝元慶問故曰爾祖以田數萬助役是義士也治義士之孫而受謝豈貧者必不能爲義乎一日與人共飯忽失箸曰與君別矣遂踣跌而逝

郭志隱逸參吳騏傳

莊字琦字連璧華亭人居莊行佃募有幹略崇禎中詣闕上書召對稱旨授太常寺博士字琦曰噫是豈吾初志哉遂辭去先是兄啓元字志和萬歷末獻策授守備防邊有功陞密雲參將後不知所終字琦走塞下訪其兄戰鬪處招魂無地慟哭而歸遂杜門不復出卒年七十

二 奉賢志
雜傳

章簡字次弓號坤能華亭人天啓四年舉人官羅源知縣

大兵下松江簡與沈猶龍李待問同守城城破死之世傳
隆武夜夢一人伏謁曰臣羅源縣知縣章簡也因陳死
節狀寤而詢左右曰有之隆武爲歎息遙贈以官從弟
諸生旭字昇東簡殉節後棄舉子業習醫爲人療治若
神乾隆四十一年簡

賜諡節愍

明史參修
章氏族譜

朱永佑字爰啓上海人居閩行鎮崇禎七年進士授刑部
主事改吏部罷歸唐王時張肯堂請募舟師倡義旅由
海道抵江南擢永佑爲吏部右侍郎未幾王敗死永佑
至舟山事魯王

大兵破城王航海去永佑被執乞爲僧不許乃就戮乾隆

四十一年

賜諡節愍

明史

吳嘉允字繩如華亭人天啓四年舉於鄉尙氣誼有才略居鄉見海水侵齧塘岸爲患日甚獻議郡守方岳貢改築石塘身任其事不避勞怨適颶風大作驚濤震撼繩如爲文以告海神拜伏風雨中風止雨息塘賴以全凡二百日而工竣福王時薦授戶部山西司主事當南都陷時繩如已奉使出都聞變亟還謁方正學祠投繯死從子永孚崇禎十三年進士選授南安府推官國變後

留贛州順治三年與楊廷麟等守贛城破死之嘉允乾

隆四十一年

賜諡節愍

婁志參修
贛州府志

黃德遴青浦人天啓四年舉人知四川東鄉縣順治乙酉

張獻忠遣劉文秀分掠川東六月賊至德遴豫練鄉勇

拒守閱月七月十二日縣役童二麻應賊城破與家人

八人入井死

白華
前稿

姚世勳字元仲華亭人天啓四年舉人澹於仕進究心易

理著易贖講義

金山
志

計安邦字伯懷上海人天啓四年舉人知餘干縣時所在

盜起鄰境張六瑚等聚眾焚劫餘干不設備突入官署
迫令助餉安邦不爲動會總兵王得仁馳救得出擢吉
安推官土寇潛踞境內安邦招餘干壯士章才章奇等
百餘人閒道援勦焚其木城賊潰走奪其所擄男婦六
百餘人民慶再生擢爲御史歸

南隄志

唐昌世字興公華亭人文献從孫父允振諸生以孝友聞
有拒奔女還遺金事生平常揭尋方便學喫虧六字於
坐隅昌世幼事祖母孝比長能文章成天啓五年進士
補工部營繕司主事時閹黨用事鄉人中有貢緣得卿
寺者昌世胥吏將謀大木廠缺懷金夜見曰願得公門

生一帖與崔尙書事卽諧矣昌世峻拒之時崔呈秀方以都御史兼工部事旣而呈秀以司禮監總戶工事建署昌世題榜無稱頌意益不爲要人所喜因目爲小東林崇禎元年呈秀敗監德陵工木商餽以金昌世怒欲執付法司哀懇去而臺省先已入商賄故事木分三等估直臺省命槩以上等算昌世爭之笑曰此商人不識時務耳昌世勃然曰公無輕諒天下士某非藉此麤官爲僕賃與馬計者也必依此寧向御前奏辨臺省中餒諸商亦耳語卻餽事遂心折款語移覆減十餘萬金強項聲益著二年我

大兵薄都城昌世爲廣寧門監督助守禦先是昌世與中
官共事辭色不少假至爭陵木與臺省相失益目攝幾
不敢釣禮及城守司禮大瑞王希忠統軍至昌世與爭
體統不合適盛甲厥運到一礮借端題參是時尙書張
鳳翔方以懸簾事忤旨下獄而司官同郡朱長世等受
杖死遂并奪昌世職而昌世亦以親老得遂色養遂歸
十五年工部尙書范景文疏薦不報福王時鳳翔起巡
撫復薦之時年已六十連喪二親哀毀骨立所跪席雙
跣隱然比服闋南都破遂屏居不復出卒年八十九弟
昌齡字吾修崇禎十年進士南京兵部主事子子麟自

何傳

唐氏
家傳

張肯堂字載寧華亭人天啓五年進士授涪縣知縣弭盜安民大著聲績崇禎七年擢御史明年春賊陷鳳陽條上減賊五事不盡用出按福建數以平寇功受賚還朝言監司營競紛紜意所欲就則保留久任意所欲避則易地借才加一番更移輒加一番擾害帝是其言十二年楊嗣昌出督師肯堂言諸臣以撫自愚一誤再誤至於三四今莫掩敗局必仍進撫議請特申一令專務剿除帝以偏見責之十四年言嗣昌喪師殆盡欺飾乖張一日不撤封疆禍一日未已疏奏而嗣昌已死復言今

討賊不可謂無人巡撫之外更有撫治總督之上又有督師位號雖殊事權無別中樞冥冥而決諸臣贖贖而任至失地喪師中樞糾督撫以自解督撫又互相委以謝愆而疆事已不可問矣帝納其言下所司詳議肯堂所條奏切中事情大率類此擢大理寺丞頃之以右僉都御史巡撫福建福王立遣人入衛南都敗總兵鄭鴻逵擁唐王聿鍵入閩與其兄南安伯芝龍及肯堂進尊號遂加太子少保吏部尙書尋易肯堂掌都察院肯堂請出募舟師由海道抵江南倡義旅與浙東相倚援乃進少保給敕印便宜從事以吏部侍郎朱永佑兵科給

事中徐孚遠從行皆肯堂同里人也芝龍懷異心陰沮之不果行順治三年唐王敗肯堂飄泊海外六年至舟山魯王用爲東閣大學士八年

大兵乘天霧集螺頭門王航海去屬肯堂城守城中兵六千居民萬餘堅壁十餘日城破肯堂衣蟒玉南向坐令四妾周氏方氏姜氏畢氏子婦沈氏女孫茂漪先死乃從容賦詩遂自經部將汝應元爲僧名無凡葬肯堂於普陀山奉其孤孫歸里事具應元傳乾隆四十一年

陽諡忠穆

明史參修
兩吳舊話

張安磐字子石華亭人父以誠廣西桂林通判安磐中天

啓七年舉人知眉州新三蘇祠頒條約惠威並著擢
霸州時畿輔戒嚴安磐練鄉兵修城隍簡軍實勤苦忘
寢食三月而病猶日坐堂皇治事不少休病亟草數事
上之大府遽卒子世雍自有傳

張氏世傳

沈文系字幼魚華亭人知新寧縣工詩賦尤精翰墨修邑

志增科舉士民戴之

湖南通志

徐益孫字孟孺華亭人與彭汝讓齊名由諸生入太學爲
南祭酒許國司業張位所知事母孝母亡絕意仕進當
路欲舉爲孝廉力辭士論推之

郭志獨行

趙原性華亭人宋荆王元儼十九代孫母病刺血膏藥告

天願以身代遂痊屋火延及宗祠原性抱木主得不燬
父病虔禱如母病時亦愈纂修譜牒以先朝詔告圖像
行實彙成十四帙巡按御史祁給額獎賞當原性游京
師子初曙敬事祖母人稱順孫及原性病甚刺血書疏
籲天夢得神方病良已母病痢躬滌廁爰供藥餌亦痊
事聞有司給額表揚云

顧允升字華字上海人允貞從弟幼失怙母病刺血書疏
籲天請代居喪三年不飲酒食肉不居內廬舍火幾及
棺呼天號慟忽雨降火滅崇禎庚午賜八品冠帶旌其

孝

南雁志

李嘉言字聖達由新安徙居青龍鎮性豪雋敦孝友母汪
失明嘉言借妻程氏夜則焚香籲天晨更勸之目復明
伯父士彥沒貧不克葬嘉言舁其柩歸葬新安有汪某
者嘗貸嘉言金將居貨聞浙閒渡曹娥江舟覆所貸金
盡沒歸欲自經嘉言更貸以數十緡慰而遣之其急難
好義如此子煥字維文燧字先五俱工詩古文爲名流

所重

青浦志

何孝童名萬京字叔鴻上海人孝友性成父疾篤萬京告
母曰兒將從父矣供養之責有兩兄在母禁之亦不慮
其死也及父卒萬京號哭出門比晚不歸母憶前言心

勤尋至溪上見遺履乃知其赴水死矣其宗人萬化爲之立傳嘉定黃淳耀有詩哀之并序其槩云

汪聯芳字瑞卿祖籍新安後遷華亭幼孤事繼母盡孝鄉黨無閒言兄早沒撫姪如子同時以孝聞者有沈季友李承恭蔡象春董振曹世祿諸從禮陳韶曹恕徐誥鄉

里皆稱之

青浦志

孫士範字洪修上海人性寬和慷慨好義事母五十餘載孝養喪葬盡禮撫猶子如己子歲饑出粟賑濟穿義渠修學宮三黨待以舉火崇禎十七年御史周元泰題給冠帶舉鄉飲賓卒祀鄉賢子大經國子博士

上海志

張元始字貞起上海人居石笥里崇禎元年進士性方
不妄交游留心經濟時瀕海竈戶舊有總催一役地
役存民重困元始力陳使釐刷一清由行人擢給事中
抗疏論封疆失事保舉非人詞氣激昂不怵權勢有
詔嘉納東南重役尤苦北運布解破家者十九元始條
奏請北運改爲官耆布解附於漕艘報可民力稍蘇息
崇禎十四年大旱斗米千錢上海漕數萬吏民皇皇無
措元始建議以麥代米得旨准十之三以麥價徵折色
先行豫省遂及江南公私俱利奉命催督漕運及積年
逋餉輸輓無阻徵解逋賦至九十萬國用以充元始在

諫垣八年忠清諳練朝廷將大用遭母喪去職服除起

太常卿未拜歸卒年六十九

上海志

曹勳字允大華亭人居干溪隸嘉善籍崇禎元年曾試第一廷試選庶吉士歷官翰林學士禮部侍郎勳少有異稟研討古今從高忠憲講學有得魏忠節大中忤璫被逮釀金賦詩憤泣追送諫者在側不顧也在經筵日爲帝所眷注時門戶角立言官交惡勳持之以正不樂與同事請告終養杜門著述自號東千鈞叟著文集十二卷詩集十卷弟炯字瞻弓博聞強記下筆千言立就工書屢試不售益肆力於古徜徉山水泊如也嘗與勳倡

小蘭亭社著有嶺雲倡和集

曹氏家譜

陳正中字宗尼上海人崇禎元年進士除上杭令縣介虔粵流寇侵擾所在煽結正中至撫彫瘵招流亡足兵食練鄉勇屢挫賊鋒復渠帥張日昇降其餘黨五百餘人捕誅劇盜何柏等三十餘人所部肅清革橋稅以惠商旅積粟備荒歲饑不害流賊復犯武平正中恐滋蔓帥衆持五日糧趨三百里擊之頗有斬獲賊望風引去鄰邑以完正中素有羸疾積勞轉篤竟卒於官在縣五載屬軍興旁午大帥駐節會師供億繁重能盡心惠養民不知兵所積官穀七千餘石羨餘贖銀悉歸庫藏公私

充實而妻子衣食不給卒之日民罷市哭巡撫鄒維璉
上言正中撫順討逆鞠躬盡瘁清白勵操遺愛在人請
賜官崇祀以昭激勸敕贈兵部主事追論平寇功再贈
太僕寺少卿

郭志
名臣

張世雍字成之華亭人安磐子少穎異工古文詞作帝京
賦五千餘言祖以誠甚愛之崇禎四年進士授刑部湖
廣司主事癸酉充貴州鄉試正考官世雍自念離經生
不三載卽持文柄入闈與同考共矢公慎得趙國祐等
朝議以爲得人越明年卒年三十

東海
家傳

徐天麟字退谷上海人崇禎四年進士幼孤好學年三十

餘始爲諸生及官南京兵部郎中蕭然如寒士以終養告歸惟與二三故人引滿長嘯詩文伉爽有奇氣所著有西郊草堂集廣蔭軒雜詠行於世

上海志

陸炫字汝晦上海人授宜春縣丞端風裁縣闕官炫嘗攝其事白監司罷積穀民受其德攝萍鄉庫帑向別貯私室吏言庫有鼠爲患傷之則失金故不可貯因緣爲奸炫爲文告神令有能殺鼠者給重賞於是害遂息遷宛平擢大寧都司都事攝深澤正殺兄獄政聲益著從孫鐘字君聲官北城兵馬司指揮時遼事方棘以廉幹著出爲潼川州同知適奢酋害諸吏以叛蜀境亂州守

言生畏甚鐘撫循士卒力爲捍禦城賴以全又有晉錫
者字康叔光祿寺典簿壁之子也壁嘗以福邸甚供億
請當事奏定其歲額人謂通達國體晉錫崇禎癸酉副
榜充恩貢特試中書宏光初補麻城知縣當鼎革之會
士民顛躓多所矜全遷辰州府推官以亂阻未任

上海志

陸志孝華亭人家貧事親孝親沒泣血喪明遇異人療之
一日復明營葬鳳山左麓廬墓三年事生母以孺慕稱

巡按路振飛上其事崇禎十二年詔旌其門

郭志
獨行

周裕度字公遠號晚山華亭人萊峯先生之孫爲諸生以
道誼風雅重於時書學米襄陽顏平原兼工篆隸善畫

山水寫生學陳白陽得其三昧爲世寶貴事親以孝聞
與人交無城府每述古今事疊疊不倦而序次詳明聽
者忘倦董思白後郡中署書獨推裕度有副將軍者慕
其名屬所知乞題額以白金爲潤其人乾沒知者以告
裕度曰筆墨之事本不爲勞白金之直與友誼孰重不
足問也君勿言敗此友名節其盛德類如此年八十二
卒子詠昭致皆工隸楷及畫以文行稱

魯志

孫得原字本卿華亭人有雋才年二十嬰羸疾遂棄舉子
業卜居東郊隙地半畝悉蒔花藥吟詠不輟又病足不
良於行每出乘一驢市少年羣戲侮之得原佯不聞也

抵家其子士高掖以下晚不能跨驢則負之而歸宋旭
畫荷父圖贈之工篆隸瀟灑有致孫孟芳世其學

妻志

郭開泰字宗林號壘恥上海人歲貢生隱居不仕著五經

指訓味諫軒雙玉樓詩稿

上海志

喬鳳將字子翔上海人諸生博學能文名滿一郡著錄弟
子至數百人士林重之

上海志

華鶴鳴字迴聞上海人秉中曾孫世專習詩經至鶴鳴尤
邃江右陳懷我以詩經課士入選者鶴鳴居其半同社
孫士美云國家明經取士如迴聞詢無愧焉孫謙復以

詩經魁鄉薦

南匯志

鞠時龍字君御華亭人崇禎中以歲貢授吳縣教諭遷太倉州學正能詩多秀句松風餘韻載其詩數首孫讓字秉謙諸生能承家學嘗客都門與諸名流倡和詩名噪

一時奉賢

志

王銑字文彥華亭人弱冠著聲鬢序爲文靜深古淡入理

弘然性尤孝事父盡色養晚年著書以老

魯志稿

何剛字慤人上海人初名厚崇禎三年舉於鄉見海內大亂慨然有濟世之志因交天下豪俊與東陽許都善語之曰子所居天下精兵處也盍練一旅以待用都諾而去十七年正月入都上書言國家設制科立資格以約

東天下豪傑此所以弭亂非所以馘亂也今日救生民
匡君國莫急於治兵陛下誠簡強壯英敏之士命知兵
大臣教習之講韜鈴練筋骨拓膽智時召而試之學成
優其秩寄以兵柄必能建奇功臣讀戚繼光書繼光數
言義烏東陽兵可用誠得召募數千加之訓練準繼光
遺法分布河南諸郡縣賊不足平也因薦都及錢塘進
士姚奇允桐城諸生周岐陝西諸生劉湘客絳州舉人
韓霖等帝壯其言卽擢剛職方主事募兵金華而都作
亂已前死霖亦爲賊用剛不知故竝薦之剛出都都城
陷馳赴南京先是賊偪京師剛友陳子龍夏允彝將聯

海舟達天津備緩急募卒二千人至是令剛統之子龍
入爲兵科言防兵莫如水師更乞廣行召募委剛訓練
從之剛乃上疏言臣請陛下三年之內宮室不必修百
官禮樂不必備唯日求天下奇才異能使智者決策廉
者理財勇者禦敵則國富兵強大敵可服若以驕悍之
將馭無制之兵空言恢復是卻行而求前也優游歲月
潤色偏安錮豪傑於草間迫梟雄爲盜賊是株守以待
盡也惟廟堂不以浮文取士而以實績課人則眞才皆
爲國用而議論亦省矣分遣使者收羅草澤英豪多得
才者受上賞則梟雄皆自效封疆而盜魁亦少矣東南

人土滿徙之江北或賜爵或贖罪則豪右皆盡力南敵而軍餉亦充矣時不能用尋進本司員外郎以其兵隸史可法可法喜得剛剛亦自喜遇可法馬士英惡之出爲遵義知府可法垂涕曰子去我誰仗剛亦泣涕願死生無相背踰月揚州被圍佐可法拒守城破投井死乾隆四十年

賜諡忠節

明史參殉節諸臣錄

張錫眉字介茲上海人居石筍里崇禎三年舉人與侯峒曾同守嘉定城破先令妻黃氏及妾與女俱赴水死偏身自書姓名登城樓自縊乾隆四十年

詔入忠義祠

上海志

張其威字子餘華亭人崇禎三年武舉妻叔錢龍錫時當國引嫌不與會試初任吳松把總勤王有功陞長河營參將張獻忠陷長河殉難贈懷遠將軍以衣冠葬廕一子秉芳官至湖南撫標中軍參將

志

周立勳字勒自華亭人以高才負盛名時婁江張采張溥吳門顧夢麟虞山楊彝金壇張明弼周鍾江右陳際泰艾南英諸人聲望相絜立勳與同郡夏允彝徐孚遠彭賓陳子龍杜麟徵六子聯社以應之商邱侯方域千里聘致遂北游中州諸名下士共重立勳然立勳與孚遠

俱困諸生孚遠以直諒稱立勳不爲危言激論有東漢
郭林宗之風孚遠或慷慨牢騷已卽曾次灑然立勳酒
酣以往時抱抑塞居恆壯心不已以酒色陶寫之年四
十三卒子龍哭之有酒狂如僕射情死是瑯琊之句時
同郡諸賢相敘會朱顥字宗遠最長次卽立勳而社事
之盛六子最先故諸君子皆兄事之立勳卒數年而孚
遠以壬午舉於鄉

魯志

李蒸字竹西原名長苞華亭人崇禎九年舉人朱履升贈
以詩有同榜人何在辭官誓已堅句蓋當時隱淪者

陳子龍字臥子華亭人父所聞前有傳子龍生有異才工

古文辭卓絕流輩登崇禎十年進士謁選得惠州府推官未赴丁憂服闋補紹興推官東陽諸生許都聚衆反連陷諸郡縣旣而引去巡撫御史左光先以撫標兵遣子龍爲監軍討之監司王雄意主撫以語子龍子龍曰都舊讖也請往察之乃單騎入都營責數其罪諭令歸降待以不死乃挾都見雄復挾都走山中散遣其衆都以二百人降子龍以定亂功擢兵科給事中命甫下而京師失守乃事福王於南都首陳防江之策莫過舟師海舟議不可緩請專委兵部主事何剛訓練又條上防守要策請召還故尙書鄭三俊御史易應昌等竝從之

又抗言詔選宮女非法諸生涂仲吉以救黃道周廷杖
舉人祝淵以爭劉宗周不當黜被逮子龍請置言路又
言中興之主莫不身先士卒故能光復舊物今人情泄
沓無異昇平清歌漏舟之中痛飲焚屋之內不知終極
可爲寒心竝不能聽乙酉遂乞終養歸八月

大兵下松江子龍以祖母年九十不忍割潛遁湖柳間當
事有以書見招者答書峻拒之辭甚厲旋遭大母喪廬
居墓側魯王授以兵部侍郎兼翰林院學士令結太湖
兵舉事丁亥以吳勝兆獄詞連及事露被獲乘閒投水
死年止四十門人王漢葬子龍於皇甫林子龍有妻弟

張寬字子服軌端子諸生有聲藝林中亦與子龍同死
乾隆四十一年子龍

賜諡忠裕

明史

夏允彝字彝仲華亭人弱冠舉於鄉好古博學工屬文是
時東林方講學蘇州高才生張溥楊廷樞等慕之倡爲
文會曰復社允彝與同郡陳子龍杜麟徵徐孚遠李雯
周立勳輩亦結幾社相爲應和名動海內崇禎十年與
子龍同登進士授長樂知縣善決疑獄他邑有不能平
反者上官輒下允彝決之居五年邑大治吏部尙書鄭
三俊舉天下賢能知縣七人以允彝爲首帝召見大學

士方岳貢力稱其賢將擢用會丁母憂歸北都變聞慟
哭累日毀家募義兵走謁尙書史可法與謀興復福王
立乃還其年五月擢吏部考功司主事疏請終制不赴
未幾南都亦陷徬徨山澤間欲有所爲聞友人徐石麒
黃淳耀徐汧等死乃以八月中作絕命辭自投深淵以
殉允彝學務經術洞曉世務獨處一室志在天下地望
旣高四方人士爭附其門好獎勵後進多因以成材兄
之旭字元初以諸生貢成均明亡欲與允彝俱死允彝
託以妻子乃不果後以陳子龍獄牽連作絕命辭從容
謁文廟自經復聖位旁子完淳字存古以諸生授中書

舍人七歲能詩文年十三作大哀賦文采宕逸亦以子
龍獄辭連及逮下吏談笑自如作樂府數十闕臨刑神
色不變時年十七乾隆四十一年

賜允彝諡忠節完淳諡節愍之旭入祀忠義祠

明史

章曠字于野號莪山華亭人簡弟崇禎九年以第一人舉
於鄉明年成進士授沔陽州知州十六年賊將郝搖旗
陷州城曠走免謁總督袁繼咸於九江署爲監紀從諸
將方國安毛憲文等復漢陽武昌巡按御史王澍令署
漢陽推官攝府事承德巡撫王楊基令署分巡道事十
七年四月憲文借惠登相復德安檄曠往守城空無人

擄官十數人齎印送賊將白旺曠收斬之日夕警備居
三月而代者李藻至巡撫何騰蛟檄曠署荆西道事曠
去藻失將士心城復陷給事中熊汝霖等劾曠失沔陽
罪騰蛟力薦戴罪立功福王立南京左良玉懷異心將
犯關騰蛟至長沙以曠爲監軍召黃朝宣兵於燕子窩
又召張先壁精騎於溆浦留爲親軍調劉承允兵於武
岡會李自成死其下劉體仁郝搖旗等六大部各擁數
萬兵至騰蛟與曠計盡撫其衆左良玉卒其將馬進忠
等無所歸突至岳州巡撫傅上瑞大懼曠曰此無主之
兵可撫而有也曠入其營與進忠握手指白水爲誓進

忠等皆從時南京已破張獻忠等攻武昌偏湖南諸將皆畏怯獨曠悉力禦之唐王擢爲右僉都御史提督軍務恢勦湖北曠有智略行軍不避鋒鏑身扼湖陰平江之衝湖南恃以無恐嘗戰岳州後軍不繼乃還又大戰大荆驛有功加兵部右侍郎長沙將王進方與狼兵將覃遇春圍大掠而去騰蛟奔衡州曠亦走寶慶長沙失騰蛟駐祁陽曠來會騰蛟以兵事屬曠曠移駐永州見諸將擁兵聞警輒走抑鬱而卒年三十七時順治四年丁亥八月也曠爲人敲首面有巨痣少孤貧讀書佛寺僑儻自喜爲文簡峭時罕識自壬午入楚後敝陬戎馬

尚獨忠房王之死無貳論者以爲無愧大節老僕董啓
行護其柩開關萬里歸葬妾陳氏殉曠死見列女傳

明史

參修此木
新雜著

包爾庚字長明華亭人御史孝孫崇禎十年進士以名節
自勵選廣東羅定州知州會鎮兵譁兵備道水佳穎被
圍爾庚單騎往諭衆解散羅定境接蠻獠往往跳梁不
法爾庚嚴開謀出奇制勝投者許以自新其魁楊翼行
來歸撫之地方始安又革穀船之稅置學田以贍諸生
民稱爲小龍圖建祠祀之陞兵科給事中以母老乞養

歸

國朝徵訪山林隱逸巡撫土國寶薦之辭不赴一日端坐
朗吟曰千秋大業今家計萬里清風昔宦游合掌瞑目
而逝爾庚家居能任地方大事如海塘圯親督工築郡
被水出粟賑飢應知府郭廷弼聘修府志著有直木居
詩集兼工書

青浦志

徐方廣字思曠華亭人本姓黃冒徐姓入邑庠爲諸生故
名與字皆藏黃字焉篤志嗜學與人言某事出某書第
幾卷第幾行無一誤者性狷介有門人爲貴官餽遺甚
厚方廣唯受一翦爲文精微研妙李長蘅凌義渠亟稱

之

魯志稿

字宗遠華亭人應熊子監生崇禎閒以保舉授延平府通判魯王時爲待詔卒於海外

陳正容字威玉上海人崇禎十二年舉人行己端慤學問該博授徒著書名籍甚所著有欲報堂全集孟子合評

陳子說詩行世

上海志

單洵字質生號狷庵華亭人崇禎十三年進士授麻城縣知縣甫兩月乞養歸里中甲申後隱居東郊白燕庵足不入城市巡按御史李森先以地方人才薦不就僧人六如居上海龍珠庵留寓安昌王遺孽知府張羽明捕治之詞連洵實不知也事下所司嚴訊考掠備至以無

左驗釋歸蕭然巾屨栖隱終身卒年六十六恂長身玉立能爲詩文微詞閒發四座傾倒生平好潔拂冠整履

雖几席必躬親位置云

魯志

徐爾鉞字九玉華亭人少孤母王教育之年十六補諸生父炎墓在湖州至是展謁攀枝慟哭賦種松別墓諸詩讀者比之蓼莪篇云所居西塔衙宜園水木清華鍵戶著述崇禎中中副榜不樂仕進郡邑累舉鄉飲大賓著有核庵詩詞集行世子游承字序東崇禎十二年舉人汲承字及臣諸生皆以詩文名幾社中時幾社中聲望最著者同郡又有郁汝持陸亮輔莫暨杜林談璘李延

渠李淑徐銘敬陸廣朱積張壽孫唐允諧徐期生盛翼
進宋卓陳夢梅杜甲春翁起鶚宋家禎李是楫陸公樞
王有孚王鈺金震龍杜駿徵騏徵李苞根大根何德著
徐恆鑒彭師度徐煒王宗熙顧必達范彤弧螯弧夏鼎
張憲趙佩如陳爾振章殿高何竹唐鉉唐鎔湯瑄郁繼
垣駱金聲徐度遼章開吳楨王元一諸人或終明世或
入

國朝間登仕籍亦有失其行事不能立傳者故附著之

晉志

參修社
事始末

施溥字汝中華亭人父大經兄沛竝仕郡佐溥以貢授永

清衛經歷崇禎時遷樂亭知縣未赴任流賊陷京師溥
歎曰我父兄皆受國恩我豈可失臣節哉遂仰藥死乾
隆四十一年

賜諡節愍

殉節錄

陳于階字仲台上海人父紹統官增城縣巡檢母徐文定
公女兄于階性醇篤嗜書精天文學得西人火器祕傳
助文定修正厯法以史可法薦授欽天監博士福王至
南都可法以閣臣督師薦陞兵部司務督鍊火器于階
再上疏極陳時務反覆數千言不用

大兵渡江于階自經於雞鳴山之觀象臺初紹統歸自南

都遇盜江中僕宋千秋冒刃捍之不克紹統被害千秋
與尸返報于階痛絕復甦統所部至江捕盜十八人磔
之剖心以祭及于階殉難千秋扶櫬歸曰江中不死爲
收尸也南都不死爲歸葬也今可報兩主於地下矣遂
自縊墓側雍正三年

詔祀明季殉節諸臣于階與焉乾隆四十一年

賜諡節愍

殉節錄參
忠節錄

瞿騫字孝叔上海人孝友積學鄉黨推重崇禎己卯歲貢
十五年賜特用進士授滕縣知縣著有勞績

大兵破城死之乾隆四十一年

賜謚節愍子毅字式似有詩名

殉節錄

徐孚遠字闇公華亭人陟曾孫崇禎十五年舉於鄉明年下第時子龍爲紹興推官孚遠引東陽許都見之使其召募義勇而東陽激變之事起子龍招降之許以不死大吏持不可竟殺都孚遠貽書子龍有憾辭以故子龍雖以功遷力辭不赴乙酉城守跳而得免既入閩授福州推官以張肯堂薦擢兵科給事中閩事不支浮海入浙浙亡奔閩會監國再出師孚遠周旋義旅閒欲令協和共事而悍帥鄭彩等不聽復返浙東入蛟關結寨於定海之柴樓會監國自長垣至舟山孚遠從之遷左僉

都御史辛卯從亡入閩戊戌滇中遣使至遷左副都御
史冬隨使入滇失道至安南王遣之行明年鄭芝龍犯
金陵敗入臺灣死孚遠遂流寓潮州居一年而病卒其
仲子永貞扶輓歸里所著詩文散佚殆盡惟餘社刻行
世孚遠少時嘗與陳子龍夏允彝言志慨然流涕曰百
折不回死而後已允彝曰吾僅安於無用守其不奪子
龍曰吾無間公之才而志則過於彝仲顧成敗則不計
也後三人皆如其言弟鳳彩字聖期諸生入太學學宗
程朱六經皆有著述尤精於詩致遠字武靜孚遠入閩
後奔走急難屢瀕於危吳高士騏亟稱之

明史鮑
崎亭集

陸起龍字吉雲上海人明允子崇禎十五年舉人知永寧
縣時歷徵令方行又議助餉永寧地最瘠起龍與當事
力爭不奉檄民賴以安流寇方亟督捕者或瓜蔓引濫
平民特嚴其令成卒無敢橫者假歸卒嘗輯行遠集表
揚先烈并刊片玉堂帖行世他著述見藝文中弟起鳳
字雲翔尚志節以濟世爲己任爲文探元挾奧不屑經
生家言詩力追正始嘗受知於熊學使廷弼天啓元年
副榜以歲貢終

陸氏
家傳

張若羲字吳東華亭人崇禎十六年進士授泉州推官擢
主事歸隱居白龍潭號如庵又號味閒漫樵郡守直指

欲薦舉隱逸堅辭不就外弟秀水朱彝尊訪之相揖於
紫茄白苧閒浮白大呼莫窺其際後發病嘔血自歎曰
此萇宏之血千古不化者也卒年七十六著有楞嚴經

注

通志參青
浦詩傳

李待問字存我華亭人崇禎十六年進士授中書舍人工
文章精書法沈猶龍事起待問守城東門城破將下城
百戶某挽之曰聞君讀爛四書今日將安之待問曰臣
死忠常事也吾第與家人一訣耳百戶曰君能如此我
先斷頭以待卽拔刀自刎死待問憑尸而哭倉卒抵家
少妾挽衣兩泣衆爭勸之逃待問笑曰死吾分也且不

死何以對此老兵卽引繩自縊氣未絕而追者至遂遇
害弟之檀諸生亦死吳志葵之亂乾隆四十一年待問

賜諡忠節

南吳舊話
參殉節錄

沈泓字臨秋華亭人崇禎十六年進士生五月而孤母宋
食貧苦節撫之成立泓遭母喪日夜撫棺號哭感動鄰
里舉於鄉卽陳母苦節建完節坊旣成進士還家葬親
遭國變乃援墓柏自縊鄉人救之不獲死遂從惟岑禪
師刺染受具更名宏忍號無寐小僕阿寅爲徒住會稽
東山國慶寺後聞叔父死奔喪盡哀因寓郡南之梅溪
坐臥一庵二子嚴廉泣勸之歸不許尋疾作絕醫藥遂

卒著有東山遺草懷謝軒詩文集從弟龍字友夔同榜

進士有文名甲申後不復出

妻志

宋天顯字敬夫華亭人御史賢孫薦授中書舍人甲申二月李自成陷京師迫朝臣入謁天顯不報名闔戶自經有舊役引賊數輩排闥救之尋稱僞旨召令寫詔天顯誓死不從賊牽曳以去既至厲聲罵賊觸階而死乾隆四十一年

賜諡節愍長子與琦字又韓從戎馬中閒道扶觀歲餘始歸次子瑞字升侯懷寧訓導以孝行著

奉賢志

王鍾彥字粲伯華亭人明時孫弱冠舉於鄉謁選署長洲

縣教諭時歲大祲自餽粥外悉以賑施郡縣有司倣之
民免流亡徵爲國子監博士尋轉工部屯田司主事甲
申三月遷都水司員外郎命方下而寇薄都城鍾彥分
守彰義門守將開門納賊被執不屈死同郡中書舍人
姜爾鴻歸其櫬乾隆四十一年

賜諡忠節

明史參王
氏誦芬錄

陳濬字扶一華亭人諸生甲申流寇倡京師濬募丁壯三
百人仗義勤王及渡江聞京城失守北面再拜投於江
同時有董夢金府學廩生聞北都陷望闕長號自刎死

南匯
志

字子曹金山衛人明末選知秀水縣將赴任值南都
不守遂焚衣冠北向叩首椎心嘔血而死

金山衛志

衛時春字和宇華亭人襲爵宣城伯甲申三月全家赴井

死

郭志

徐念祖字無念華亭人階曾孫諸生順治二年

大兵下松江念祖曰我所居先人賜第也國恩在焉我獲

死所矣乃夜置酒與家人歡飲若平生書絕命辭於壁

與妻張氏女迷姑美姑妾陸氏李氏暨僕孫汝濱孫喜

倪采以次就經幼女年六歲不能自縊趨而投於井乾

隆四十一年

詔入祀忠義祠同時念祖有從弟涑聞念祖死卽自沈黃浦中後二年涑兄開祚復以陳子龍獄辭連染繫江寧

死

明史參修
徐氏族譜

徐本高字維嶽華亭人階元孫幼孤祖太常卿元春撫之天啓初以廕仕錦衣衛指揮僉事時同官某將建魏璫祠於馴象所本高以祖制拒之又因會飲命梨園演劉瑾故事璫銜之會楊漣左光斗下獄本高陰遺藥餌璫遂矯詔削職放歸莊烈卽位召復原官二年都城被圍以分守彭義門功陞都督晉秩太傅旋乞養歸

大兵下江南不食死

明史參王
煥撰行狀

明德原名檢德字文所青浦人補崇德縣諸生甲申三月李自成陷京師痛哭絕粒死陳忠裕子龍有輓顧文

所詩

陳忠裕公集

李唐禧字長懣華亭人世襲千戶能文善書喜交游有文士風同里陳子龍夏允彝咸愛之甲申春輓運北行聞京師陷草檄告郡縣起義師莫有應者會宏光立有詔趣糧艘入南京唐禧先至授指揮同知時馬士英枋國四帥列淮上各擁兵觀望唐禧上書請出師不報出爲福寧副總兵已而南都陷唐王授爲前軍都督僉事故與南安伯有隙恐圖已遂就魯王於紹興特進右軍左

都督拜鎮南大將軍西興兵潰王出走唐禧被執主帥
勸之降不應同時被執者總兵張廷綬御史沈履祥三
人激烈如一明日復勸之又不應如是者三知不可屈
乃同斬於市年三十六

殷頑錄

周之遠以歲貢官揚州訓導

大兵南下協守城池晝夜不怠城破投天寧寺井死

殷頑錄

包洪策華亭人通海籍官新都縣知縣崇禎末流寇攻城
兵少食盡城陷被執罵賊死乾隆四十一年

賜諡節愍

殉節錄

莫是驩字重卿華亭人方伯如忠姪崇禎三年武舉授山

東前鋒營守備隨征李自成屢立戰功後於安慶鄆家
店遇賊戰死贈懷遠將軍指揮同知乾隆四十一年

賜諡節愍

殉節錄

李中孚字士修上海人府曾孫工騎射官劉河守備與黃

日章同日戰死

南匯志

黃日章字叔開崇禎十六年武進士任劉河守備時流寇

蔓延日章練卒伍勵忠義咸樂爲用甲申以松江游擊

調赴劉河守禦所部義兵百餘人皆驍果妻王氏亦能

軍親佐桴鼓日章盡力盡而死王氏見列女傳

南匯志

劉鎮國金山衛人武進士累官游擊將軍衛城破與子某

俱殉節

金山志

蔣若來字龍江上海人張國維巡撫應天以將材拔爲前軍僉事檄援江浦有功仕至前府都督討張獻忠卒於

陣詳見張行言禦寇傳中

忠節錄

張鳳翥字聖如上海人武進士官劉河遊擊甲申力戰死

南匯新志

馬元調字吳甫上海人諸生儻居嘉定能古文詞與黃淳耀唐全昌諸人友善宏光時同侯峒曾倡義誓死守

大兵破城死之乾隆四十一年

詔入忠義祠

殉節錄

吳志葵字聖嘉華亭人世家子也崇禎中以武舉事蘇松
巡撫張國維國維重之由材官累遷游擊將軍處要職
宏光立擢授副總兵鎮守吳松明制江南不設鎮下江
兵皆統於吳松名爲副將實大將也志葵爲人頗智有
膂力能屈節事賢公卿以故諸公皆稱之顧長紈袴不
習兵事以南人爲南將未嘗遇大敵乙酉五月

大兵南下列城望風款附松守姚序之棄官去華亭令張
大年舉城降豫府在金陵命參將洪恩炳爲安撫使與
大年俱來恩炳驕蹇入郡坐堂皇令大年匍匐謁見郡
人頗議之而是時搢紳先生爭出投謁吏部左侍郎董

羽宸亦出謁安撫色甚倨且屬羽宸作書以招志葵令
釋兵民以是益譁時吏部考功司主事夏允彝兵科給
事中陳子龍方以國亡謀奔海外而羣忠義之憤於安
撫者日以民之怨歎爲言舉人徐孚遠好奇計與子龍
善諸生張密者故嘗佐何剛練水師好言兵子龍內弟
也兩人日夜以義聲說子龍子龍謀於允彝允彝曰是
不可爲也而義不可已也姑聽之乎遠聞大喜卽部署
諸喜事少年得數百人起兵有日矣而志葵適以吳松
兵至志葵之不降也劫於其將魯之璵及得郡紳書益
怒遂率舟師由黃浦抵城下至則洪已去張大年逃志

葵入盡取府縣庫藏劫諸摺紳助餉燔燒圖籍收漕艘
謀挾之歸海允彛子龍及張密持不可志葵意未決之
璵奮曰今有萬人之衆幸有餘糧進足以觀變何乃退
也志葵不得已議進師而城守有常壽寧者郡人素無
賴以世職誦事志葵漫言城守事志葵許之令以便宜
從事而身與之璵盡率所部由泖澱趨蘇州謀以暮夜
劫城不克之璵戰死志葵懼謀引歸會黃蜚至蜚衆約
二萬人志葵倚以爲重遂受其約束允彛得謝歸時郡
事一聽常壽寧故兵部侍郎沈猶龍在籍壽寧以書索
餉猶龍曰若以起義劫我家邪我亦且起義召子龍孚

遠等議事諸人推猶龍主城守而廢壽寧猶龍下諸將
略惟檄委中書舍人李待問麻城令單恂羅源令章
舉人張壽孫等守四門八月初三日

大兵由青浦薄城城破猶龍待問簡皆死城中士民十不
脫一死者二萬餘人初六日蜚與志葵始連營歸海

大兵邀之黃浦蜚等大敗俱被獲允彝聞之曰謀人之軍
師敗則死之遂赴水死後一月志葵與蜚同斬於江寧
又二年而子龍以吳勝兆之獄連及被執亦不屈死惟
乎遠以非主名得亡命赴海去

殷頑錄參
雲間兵事

謝漢字元若華亭人少好武事有膽決家素封當崇禎時

見國事日壞慨然歎息招致劍客俠士與習擊刺講陣
法甲申夏走維揚以策干高傑傑不能用謁保國公朱
某朱薦授游擊將軍俾率一旅守江

王師南下馬士英棄兩淮不顧漢極言兩淮當守守淮乃
以守江大拂士英意罪以非所當言奪爵歸里金陵失
守吳松總兵吳志葵起兵以書招漢漢盡散家資招義
勇五百餘人往爲軍鋒屢有戰功六月二十六日戰於
桐里漢率所部奮勇先登後師不繼深入無援遂死於
陣時年三十三所部多死其妻子羣詣漢家哭曰將軍
受高爵固宜以死報國耳吾儕小人捐軀疆場孰爲養

孤寡漢弟沆盡斥賣田宅服物器用以分給之萬金之家一朝都盡獨赤身走數十里外假一椽爲童子師以給衣食終身不言貧

吳騏集

翁英字際蜚華亭人崇禎四年武會舉第一廷試一甲第二人官游擊將軍後與沈猶龍同守郡城城破隱於北

橋吳聖兆之亂見捕死江寧

殷頑錄

戴泓華亭人諸生同沈猶龍守松江力竭與嘉定舉人傅凝之赴水死乾隆四十一年

詔入忠義祠

殉節錄

徐世威字度遊華亭人孚遠子孚遠與吳江舉人吳易舉

兵太湖世威亦在營乙酉八月二十五日大雨爲吳聖
兆所敗一軍盡覆世威死之

社稷本末
參忠節錄

姜君羽華亭人乙酉八月死難其子七官撫尸不去被殺
七官妻毛氏見翁與夫死亦赴井一門自盡者十七人
祝俊卿爲鄉約長聞侯承祖被執自刃其妻子而後自
縊死祝二元以木槌狙擊見殺鳳氏父子兄弟鄉勇也
開戶納承祖

大兵至死之

明末松江
忠節錄

侯世祿字公藩華亭人父承祖字懷玉世襲金山衛指揮
使順治乙酉

大兵下金山衛城承祖死之事具前名宦傳世祿讀書有忠孝節事急或勸航海存侯氏一脈歎曰父死忠子死孝分也覆巢之下寧有完卵乎且名義所繫事有重於此者遂不聽力戰死被圍時作詩有身沾雨露心難死肉委泥沙骨亦香句聞者感之仲子世廕字美漢別治一軍於柘林知父兄殉節母姊俱自經遂詣軍門奮言曰某侯懷玉次子也請就刑父尸旁都督義而釋之乞父母兄姊尸淺葬衛城北郊後二年以謝堯文事連染竟死又八年而郡人募葬三忠骸骨歸其先壟其疏文有鴟毛易燎白骨難埋誰憐葛尚之忠未表田橫之墓

云云乾隆四十年承祖

賜諡忠烈世祿人祀忠義祠

華亭志參修
遜志齋隨筆

張昌後金山衛人本姓倪外祖張某世襲百戶撫爲己子
崇禎二年襲職乙酉七月從指揮侯承祖赴郡總兵吳
志葵見而異之留帳下八月初六全軍覆沒昌後身被
三創子育負歸割股療之尋愈二十日城破一慟而沒

殷頌
錄

莫道張字君大華亭人諸生順治乙酉八月

大兵破松江殉節家祠中盧元昌有完三先生傳

殷頌
錄

蔡喬枝居西郊延恩巷口貧爲人傭有膽力乙酉八月

松江府志

卷五十五

古今人傳七

奕

大兵下松江喬枝手持鐵鞭重八十斤抗

王師巷戰力盡嘔血死

魯志

姜超金山衛人長八尺膂力過人聞流寇躡川陝欲自效
行間鑄刀重四十餘斤每春秋以米二斗造飯及魚肉
等物植刀跪祝曰吾得用汝死無憾祭畢盡啖之自謂
家貧未嘗飽餐惟祭刀得果腹

大兵圍金山超守北門外用火攻從北水關進超持刀力
戰血滿隍池勢不敵退與陳廿八會十字街復手刃至

二百餘人自刎死

金山衛志

朱家臣字蓋卿世居金山衛城性剛方動必循禮

大兵下金山家臣具衣冠端坐臨以白刃不屈遂死諸生

楊寅東字季垣亦同死郭元吉長吉俱自縊

金山衛志

張乾衛城人應中軍副府幕乙酉

大兵至乾赴水死母寶氏妻魏氏子六人及婢僕輩凡十

九人闔門殉難幼子正心甫四齡已入水似有老人攜

之出者撫於舅氏得不死

金山志

蔡九韶上海人居新場乙酉

大兵至松江九韶投水死

南匯志

張秉淳華亭人諸生乙酉六月聞新令下臥牀不食或以
無益勸曰古之捐軀殉義大率在破亡之際其有益於

事者幾人哉遂卒

殷頌錄

張時傑金山衛城人世襲千戶掌南所印將軍浩然之仲子也勇而多謀嘗畫攻取戰之策數條見知備兵使者乙酉八月衛城破招其子起宿及僕曹忠助侯世祿巷戰中流矢殪子僕皆沒逮收葬時鬚眉猶畢張也

金山志

俞積沛華亭人從夏忠節死見稽永仁抱犢山房集其弟

改姓沈名天成別有傳

漱芳齋詩話

陳回上海人居新場松江破見人輒流涕遂自縊死

明末松江

忠節

實錄

張齊華字彥伯華亭人之象曾孫幼穎慧能文明亡悲憤

無所發一寓之吟詠凡殉難諸臣各賦短章以弔之子
斌臣崇禎六年武科後欲起兵應魯王爲嘉定人所殺
婦楊氏自經

上海志

張謇石華亭人幼孤能自成立爲諸生試輒高等國變後
往來海上得監國之信歸結同志聯名上表謝堯文事
敗誅堯文者上海諸生也嘗坐事繫獄嘉定侯峒曾救
之銜感國報

大兵南下堯文往來舟山峒曾令通書黃斌卿書出陳子
龍手於是蘇孝廉顧咸正與陳子龍夏完淳等或密疏
魯王或馳表隆武悉付堯文堯文留滯闕未行爲柘林

游擊陳可所獲搜得書疏以上提督吳勝兆勝兆故有
逆謀祇檄府下獄頃之勝兆事敗伏誅巡撫土國寶
其家悉得諸書表捕咸正峒曾完淳等窮究其事先後
死堯文亦不免同時有喬景星喬世忠董佑申董剛袁
國楠宋用枚宋一作木竝以郵表事死又蘇州府志顧天造
傳載順治丁亥上海諸生欽浩通款舟山僇死佑申羽

宸子世忠一琦孫也

殷頑錄

殷之軫字元素華亭人以貢授中書舍人宏光時擢車駕
主事後以吳聖兆獄辭連及逮至江寧斬於笄仁橋子
日勇弟之璉從弟葵從姪璋鍾俱死

殷頑錄

張寬字子服諸生華亭人亦以吳勝兆獄辭連及與之輅

同日死

殷頑錄

吳永孚字休仲華亭人居張溪崇禎十三年進士授江西南安府推官致政後留贛

大兵破城赴陽江口死

金山志

李綺榜姓錢字友三號紫公逢申從子崇禎十三年進士授瓊山縣知縣南京潰爲李成棟齎奏迎永厯於端州授西臺永厯敗殉難於廣城子二先卒無後事載華復叢兩廣紀略方以智兩粵新書

朱錫麟字元序上海新場人諸生乙酉偕華亭蕭賓侯渡

海寓舟山僧舍辛卯

大兵至舟山死之

南匯新志

林鍾字歸曉青浦人甲申後絕粒時年八十矣家人環跪

請少進茗飲後知雜以葷遂絕飲未幾卒

青浦志

王匡字就之號介庵郡庠生善書郡城破被難今祀忠義

祠

上海新志

王稽古改名雄字成博以薦授濟南府同知甲申殉難又

有徐百瑜者貢生署邑教諭亦殉節

上海新志

吳中秀華亭人懋謙父城破見殺同邑諸生蔡樅與周規

友善城破亦死

明末松江忠節錄

朱天爵字元序上海人甲申後同蘇兆仁渡海寓居舟山

僧舍聞

大兵至俱自縊死

舟山外紀

陸厚元華亭人衣工也城陷積薪於門語其妻曰能完節

乎曰能遂與一子一女共縊死厚元舉火焚之乃自縊

同邑沈懷敬率女孫赴水死

明末忠烈紀實

查某失其名字君甫爲府胥吳聖兆之亂與其謀捕至論

死笑曰我一介小人今日得與士大夫列爲忠義而死

死猶生也臨刑神色不變

殷頑錄

松江府志卷五十五終